

# Koinonia Gospel Ministry

Volume 1, Issue No.2

February, 2019

## EDITORIAL COLUMN



Pathen lungset najal a KGM Monthly Bulletin issue a 2 channa boljom thei a ikoi uvah Pathen thangvah in umhen. Tulha sung a igel khomdiu va hung kitah lang nomchu **Christian Neichin** tih ahi.

Psalm 24 na a leiset leh asung a umho jouse hi Pathen na ahi ti kichih tah in ase in ahi. A chutieleh leiset chung a inei igou chuleh eima jeng jong pathen a ahi ti isuhmil loudiu ahi. Na thahat a nalamdoh jouse jong ama a ahi. Ahin Pathen in abonchan neipen atipon, aneipa hetdoh na dinga som a khat bou athum in ahi. Kipah tah a aneipa henga na choi hinam? Nachoi lou chun napeh na ding mun tampi umding ahi. Nape pa koma nachoi leh phatthei na tampi nadon jing ding ahi.

Paul in Timothy hengah Neichin hi, “Keima a kon a najah chengse chu Christa Jesua um ginchatna le ngailutna chun tuh jingin, nangma kipea thilpha chu eihoa chenga lhagao thengchun hongphan.” Pathen a kon a huhhingna ichan na thuhi chingthei tah a ventup angaijin ahi. Chuleh ichin tup Pathen thu chu suhpung ding ahi. Midang ho koma pehson ding tina ahi. Example: Dukan a thiljoh aneipa hilouva ajoh a pang hokhun athiljoh ho khu phatha a mi gucha hon aguhlou nadia aven uva chuleh koi chohsah thei di ham tin miho koma aseileu vin ahi. A ipi chu hitaleh Pathen in ei nganse nau hi eikom a moh umthim ding hilouvin, midangho peson dinga ngansena lentah inei u ahi ti sumil poute

Lalboi Doungel  
(Editor)

## NANG HON HICHE LAMPI HI NAHO KHAH LOU LAI U AHI

Seikhogin Haokip, Lecturer  
Servanthood Bible College, Dimapur



“Nanghon Pakai na-Pathenu kitepna thingkong khu Levi thempu ten a put uva aki tolu namu phat phat uleh, nangho jong na umna mun cheh a konna naki patdoh soh keiyuva thingkong nung khu na jui diu ahi. Hitia chubou hoilam najot diu ham ti nahetdoh thei diu ahi ye; ajeh nang

hon hiche lampi hi naho khah lou laiyou ahi.” (Joshua 3:2b-4a) By:

**Thumakai:** Kum lui igal kai uva kumthah ihung lhun utoh kilhonin mi tampi in kumthah plan iki gon laitah u hidin katah san in ahi. Mi abang khat chun kum thah hi ipi ti hinkho kaman diham tia lungkham loi jong ium diu ginchat a ume. Kimkhat chun New year resolution kistem ma hiche dungjui ya chu phatah a kum lhun ding ngaito loi jong mi um tei inte. Ahin tunia hiche article in ado le atop chu tukum 2019 apha pen le ahoi pen a ijot galkai thei na diu va ipi ibol diu ham? Koi to iki lhon diu ham? Ahi lou le koi nung ijui diu ham? Ti chu Israel te Jordan agal kai uva Cannan gam alut kon u thusim a konna ina vet diu vin kahin dei sah e. Joshua 3:2-4 sung kahin peh na a kon hin Pathen thu point thum ina vet diu vin kahin kahin tah lang in ahi.

**1. Pathen thingkong le Levi thempu te:** Pathen in Joshua komma ase chu nang ho Jordan nagal kai uva canaan gam jondia naki pat doh teng ule Levi thempu ten Pathen thingkong chu aput diu mipi masanga che diu ahi. Chuteng le mipi chu Pathen thingkong le Levi thempu ho nunga chu kijot diu ahi. Hetding chu Israel te hi canaan gam jon a aki tol nau va hi nam chom chom ijat hamkhat in ana dou dalu ahi. Dougal melma dimsetna nei nam mite ahiu vin ahi. Hitobang condition ah hin Sepai galsat them le hangsan hon mipi chu lamkai ule kilom tah ahin ahi. Hinla Pathen

thinkong pu thempu ho chu sepia hole galhang ho masang ah ana kijot uvin mipi chu ana lamkai uvin ahi. Hichea konna ilah doh nom uchu eihon jong ihin kho uva Pathen amasa pen a ikoi diu eiko mu peh uvin ahi. Kison na ijat hamkhat jong chu nanei meithe i ahi nai, hijong le Pathen sanga hatjo, chingjo, themjo, le bolthei jo aum pon ahi. Na chihna, nathepna, na nei na gou le sumle pai ho naki pui sah le nagam man pa tei tei ding ahi.

**2. Hitia Chubou Hoilam Najot diu ham ti nahet doh thei diu ahiye:** Pathen thinkong mipi masanga Levi thempu ten aput uva aki jot tengule Pathen in ajot nadiu lampi ako mu peh jiu va hiche dungjui ya chu lam ajot thei u ahin ahi. Joshuan Israel mipi te kom ma chun Pathen thinkong nung a kijot a Pathen thinkong chu ve pum ma lamjot din thupeh ana nei in ahi. Ajeh chu Israel chate kijot na hi tulai ya eiho lampi ho bang hilou ahi, gamthip leh gammang lah a canaan gamchu ahin lhang jot tho u ahi. Hichea hi Pathen chu a thinkong chungu chu pansa a amite chu apui ahi. Sopi te, hiche point jong hi eiho tahsan chate lamjot toh kitoh kasa na lom e. Tulai khangthah tamtah iti hinkho mandi ham jong hethei ta lou va lamvai atam tai. Mi nu mipa tampi insung pohna je he ta lou va insung chavei atam ma ma jeng tai. Mitampi ahin vanga aban lamjot be naje he lou va kitang den na kipah thei ta lou jong a um da pon ahi. Hiche ho jouse chu ipi jeh ham? Pathen a ki puisah lou jeh u ahi. Pathen in eipui tengu le bou hoilam ijot diu ham ti ihet thei diu ahi ye.

**3. Ajeh chu nanghon hiche lampi hi naho khah loulai u ahi ye:** Israel chaten Egypt a pat a Canaan ahin jot nau lampi hi masang a khatvei jong ana ho khah nai lou u lampi chu ahi. Hijeh a chu amasang uva ipi um di ham jong ana he po ve, ito bang gam le lhang a phah pa diu ham? Vadung umdi ham? Korse um di ham? Sahang um di ham? Ahi lou le twikhang len um di ham? Tiho ima ana hethei pou vin ahi. Hinla Pathen thinkong amasang uva ache lai chan in Pathen in Israel te chu sun le meilom in apui in Jan le meikong in apui jin hiti chun ache khah lou nau lampi hijong le Canaan gam chu ahung lhung thei tao vin ahi. 2019 kiti kum jong hi eiho dinga ijot khah nai lou u lampi chu ahi. March a ipi hung lhung ding ham? Ahi lou le June a ipi hung lhung ding ham? Koima chan aki he pon ahi. Ahi loule ima sanguva ipi eihin to

diu ham? Koiman aki he pon ahi. Vangphatna jeng jeng hilou ding ahi, hahsatna le lungjin lunggimna jong umtei ding ahi. Ahin imasang u gimnei lhez jong le Pathen to iki lhon laiseu va kichat na ding le lungneo na ding a um poi. Pathen in damsel a tukum jong eipui lhungdiu ahi ti tahsan lel a um poi. Pathen a kisong lou, Pathen a kingai lou, Pathen in alam kai lou miho ding in vang 2019 hi kum pha hidin katahsan pon ahi. Achaina isei nom uchu 2019 hi ahoi theipen leh apha pen pen a naman nom ma nagal kai nom ma, kumpha kum hoi, phatthei na kum, lolhinna kum, kipana kum chule khantouna kum dinga nadei le hiche ho jouse neipa le pethei pa "PATHEN" kipui sah inlang ama to kilhon le chun kumlhun tengle Pathen vahchoi na tanglou va nanei nom ding ahi. Asim jouse Pathen in phatthei boh taken.

## KGM MEMBERSHIP

KGM Kumthah Kivaihomna Res.No.2 a kisei dungjui ja KGM Member hina dihtah neina dinga Registration form fill up bolding kinop tona chu Form aki sem jouvin fill up pan thei ahi tai.

### **MEMBERSHIP FORM SEMNA JEH:**

- i. KGM hi chom khat a ding/khangthah lai bou hilouva Jinei nung chan a Pathen adia kiloikhom jingdi deina jala kiseum ahi.
- ii. Koi jouse kidel joulou ahijeha ministry kicheh ta a jaoho nopni/dani a kithokhom ding dei najal a hung kiseum ahi.
- iii. Sponsor akinei lou jeha KGM Box koicheh a thaleh jung/sum leipai a Pathen lenggam adia panlah khom ding deina jal a kiseum ahi.

### **Notes:**

- i. Registration Fee umlou.
- ii. Munchom ma um ho in jong online a nahin fill up theina dingu aki ngaito jinge.
- iii. Membership form hi in mun a um a practical ministry jao hobou a ahapon, gampam a um hon jong membership form laha ipan nathei lampi a pan ding tina ahi.

**MEMBERSHIP FORM MU NATHEI DING:**  
Lunminthang (Director) leh Santosh (Co-Ordinator)

## PENTHAHNA

Boipu Touthang ([christianboipu@gmail.com](mailto:christianboipu@gmail.com))



**Thumakai:** Tukhang (21st Century) Christian tapi ho hinkhoman ivet ji teng kah khat kom le amaho sangin keima joh lungkhamna'n kadim jin keile kei thudoh kakidoh na atamji e.

Hiche kalungdongna le kakidoh ji thudoh ho chu amapa/amanu khun kapengthah e atikhu adih nadem? Or huhhingna kanei tai atikhu adih mong nadem? tiho hi ahijie. Ajeh chu nun le khan, neh le don, vannoi mite toh kikhehna aumji lou jeh in. Konkhat chu kapengthah tai, Christa huhhingpu in kakisan tai ati nunga jong apenthahna chungu lung ngam nailou doubt nei nalai aumjin ahi. Hijeh a chu tunia pengthah ihile ihilou iboilou nadiuin bible a jesun jong eiseipeh un, bible a muntampin jong eihil uve. Chujongle bible in, eima tah tahsanna a iumle iumlou kikhoh di aseijin ahi(2cor.5: 13).

Hijeh a chu mipengthah ihi ihilou ahiloule huhhingna kichieh neile neilou ikihet thei nadiuva anoiya hin point themkhat ahung kipen anaveu hite. Hichea konna hi nadin mun nakihet chet thei ding ahi.

### **PENTHAH NALE HUHHINGNA KICHEH NEIHO HETTTHEINA PHABEP** (Some of the signs of genuine saving faith)

1.Jesu Christa toh kiloi khomma chule athisanna alhatdohsa amithengte toh kiloikhom hi kipana a nanei hinam(1John1: 3).

2.Miho'n nahin vetteng, muthim lah a avahjing nalaiye atiuvem? Ahiloule vah lah a avah tai atiuvem(1john 1: 6-7)?

3.Michonse kahi ti nanop a nachonset naphon hinam (1john1: 8)?

4.Pathen thu ngai(obedient) nahi hinam(1john2: 3-5)?

5.Nahinkho hin leiset thil nangailut sanga Pathen nangailut joh dan aphonoh a atahlang jing hinam(1john2: 15)?

6.Nahinkho'n chonphat nalam adeljing hinam(1john2: 29)?

7.Thenna hinkho naman hinam/nadel jing hinam(1john3: 3)?

8.Nahinkhoa chonset khanglouva akemsuh cheh<sup>2</sup> namujing hinam(1john3: 5-6)?

9.Na Christian chankhompni dangho kom a ngailutna nanei jing hinam(1john3: 14)?

10.Natoh a podoh louva "seitho mei<sup>2</sup> le satho mei<sup>2</sup>" a hing nahi nalai em(1john3: 18-19)?

11.Lungput dih le lungthenna hinkho naman hinam(1john3: 21)?

12.Na Christian hinkho lam najot na a galjona(experience) nahin neikhah tah em(1john5: 4)?

**THUCHAINA:** Chungu hung kiseile thudohho chu lungthengsel le dihtah a"henge" tia nadonbut theile (lam najot jing lai pum a atamjo chu henge tia nadonbut theile) nahinkhoa penthah nahi a ga chule huhhingna kichieh nanei tai ti photchetna le kihetna ahi. Jesu Christa'n ama tahsan a anungjui ho chu mihon aga uva tichu, anun le khan u, aneh adon u, aham apau u, akivon dan u, nitin ahinkho man uva konna keija ahi(ama chate ihu) mihon ahettei diu ahi anati. Hijeh a chu Jesu Christa'n thingphungpha aga pha-mipengthah(Pathen chate) toh atekah a, thingphung phalou aga phalou-mipengthahlou(Pathen chate hilou) toh atekah ahi(Matt.7: 16-20).

Mi pengthah le huhhingna kichieh neiho chun Christa a um lungput chu aneyun na pha atongun, thilpha di agellun, ama akon aga miho nehthei ding agadoh sah e ti sumol pou hote.

Jesun John 10: 27-29 na a" Ka kelngoi ten ka o aheuin angaijun chule keiman jong amaho kaheuve"ati.Hijeh a chu tuni Jesu Christa o ijah uva athu ingai ule eiho jong ama(Jesu) kelngoi lah a pang ihuive. Ahinla Jesu achen achaiyin hejong leu hen athu init lou ule ama kelngoi ihinaipouve. Ajeh chu Jesun keija ten ka o aheuve ati'n,penthahna neile huhhingna kichieh kanei tai tiho chu Jesu thusei aja ho(hearer) ahipouvin, ajah ho juimi(doer) ho chu ahive.

## TECHNOLOGY LEH MIHEM LUNGGEL

(*Psycho-Ethics analysis*)

Mr. Jangminlal Mate

Principal, Grapevine International School



Mihem chih na in van ahin phahding ahi tia ana kisei leh ina jah jing uchu tukhang 21<sup>st</sup> Century hi ivet leh alhung tabang in akilang in ahi. Masang lai 15<sup>th</sup> century apat 19<sup>th</sup> century chan mihem ten science hita

hen, social leh politics jat-jat athah thah ana podoh jong leu, technology hung hakhan tou dehset nachu 20<sup>th</sup>-21<sup>st</sup> century hi ahideh set in ahi. Hiche tabang technology khantou dante hohi apha lang a mangthei ding in apha ahina in ahinlah tu (present) a thil umdan leh science in tuban kum ijat ham jou ading a amube chu, mihem hohi technology in ahinkho hou ahin khelding dan teho nasa tah in atah lang un ahi. Albert Einstein jeng injong anasei chu, “Katijat na len pen chu technology in khat veiteng leh mihem ho ahinate hou ahinkho khel khahding ahipen e” ti in ana sei in ahi. Technology kiti hi aphantna tampi seiding umjong leh asuh set hi khangthil chuleh kimoh semhoithe i louding thil ahi, akhoh natah khat chu technology khantou nahi akikham theideh pon ahi, hiche hi mihem aum laise a mang-louding thil ahijoi. Kapil leh jengtai ti a tu 21<sup>st</sup> century scientific achievement akon mitam pi kiletsah hohi chondan (ethical perspective) akoun ihinvet leh aching behseh in akilangpon ahi. Technology khantouna hin inamsung ujong neukhat atongkha jap in ahinlah atam jon amandan ihopo vin ahi, hiche hi kikhelna umlou a achaltou jing leh I psychology te houjong hungkikhel intin ichondan tehoo jong hungmang jeng thei ahi. Hijeh chun thil-poimo ho apoima na a umpoi iti masang uva I psychology uhi technology maito dan iti ihilding uham ti ihet u angai lseh jeng in akigel e.

### 1 Technology ipi Ham?

Technology hi Greek paova kon hung kipan ahin hichu *techne* akitin ahi, hichu boltheina, kitup tah leh hoitah a thilkhat semdoh tina ahi. Plato Greek philosopher in, *techne* hi politics ajong a thuchang anamang cha-in aman aman je chu thil hoitah leh government kitup theina ding a apha lampang a thilkibol tin amangchai. Phat chomkhat jou in

technology hi miching tampi in amudan ase i un hichu, “I lung-ngaichat suhbulhit theina-ding or asu bulhit theiding thil semdoh” tin ase i un ahi, hichun ahop ho chu thiltampi ahi, computer, mobile, gari, huikoung, rail, robot etc ahop sohkei in ahi. Ahin lah Martin Heidegger German Philosopher in technology kiti hi eiho polang a thil umho mai-mai hilou in eiho ihin nauva eikipe u thil ahi, chuleh eiho ma-ma in kitup tah leh hoitah a ipeh doh son houchu technology ahi ati. Chechu ahi leh Machine ho mai-mai hilou in poetry, thusim, jaila kiti houjouse jong technology ahi ati. Heidegger mudan chu ahoi lseh jeng in chuleh ahop jong alen in ahi, chechu ahitah le ei polang a thiljouse chu eija koun ahin, eima ma in achung a thu neiding, aman eichung a thu anei lou ding tina ahi. Ahinlah tukhang a ihi-nava kon eipui mang u mechanical leh electronic “technology” hojoh hi alhang pi ahi. Muthei lou thil thugil hole lunggel hoi inei thei hou chu isem doh hou thiltampi joh in ale manchah dan in akilang in hijeh a chu hiche hochu ipi ham? Iti iman ding uham? Chule Ichan a cheho chun eisuh mangthei uham? ti ivetding u hi apoimo lseh in ahi.

### 2 Technology Ahung Machal Jingdan

Greek te in ana-pom u thuchih chu, “A itih apat a ana umsa hijong leh thiltam pi hi mihem tehin asetna hita hen aphantna hita jong leh ihegei ji lseh un ahi” tihi ahi. Masanglai in technology hi ana um-jingsa hijong leh miten neocha bou anahe un, asemdoh u thilkhat um tajeng ji jong leh aset ding leh aphant ding dan ana ha hetgil ji povin ahi. Albert Einstein in Atom Bomb semna project a pan alah achun mi tampi thina thei ahi ahe in ahin hiche tabang chemical phalou chun akhang-akhang a mihem hinna atoh khah ding ana muphapon ahi. Sautah mudan in apet tah in ana kigel jong leh amusau jou tah-tah pon ahi. Europe gamkai technology a aha khantou ma-ma jeng un khangche dungjui in nitin in khantouna anei thei uve kiti jong leh kijou lou maithei ahi. Ahinlah tu hin miten aheddung jui in technology in Europe culture asuh hoiloudan leh mihem te adeh a khangdong ho psychology aphilou lang a apuidan aha mudoh un, miching mithem ijat ham hi technology khantou nasa tah in adoudal in ale pan kit un ahi. 20<sup>th</sup> century akoun technology khantou dan te hohi ivelvet leh mihem te in ale del phah lou tabang in ahung le umthei in ahi. Science hita hen politics hitajong leh khantouna hi



aphat dung jui-in ahung umjing in ahi ahinlah technology hunghat panna hi 20<sup>th</sup> century akoun ahideh in, Rocket, Spaceship, electronic thilho, atomic energy, dam doi jat-jat ahung umdoh in ahi. Hiche hohi ivet leh ahoi in akilang ma-ma jeng in ahinlah phat ache jomjing teng hunghoisot lou maithei ahi. Technology khantou aphot louna lang E.Huxly English writer pan ana mujeh in hitin ana sei e, “Technology soh in hungpang hih in” tin mite ana vailhah jing in ahi.

### 3 Technology leh Social Psychology

Social psychology iti leh, mihem changkhat cheh (individual) leh society kikhah kiguijopna (relation) ahi. Chuleh society in mihem pa or nu lunggel chu iti ale khel jou em, athil mudan iti kikhelna umjou em, ti ahipen in ahi. Greek philosopher Aristotle in mihem hi social gancha (social animal) ti in ana minvo in, ajeh chu mihem tilou ganhing mai-mai hon society aneithei povin ahi. Aman ase na a politics leh social kiti hi mihem ten ajamsan thei poi, ajeh chu hiche hinna or chonna chu athisan uva beh ahi ati. Mihem khat in animal a angaichat chu society sung a aumtei in, chuleh angaichat chujong society ma-ma in asemboh peh kit e tin Wilfred Trotter social Psychologist panjong ana sei kit in ahi. Chule 20<sup>th</sup> century ading a psychologist minthang tah Sigmund Freud leh ama nung jui ho in tu a social boina (problem) hohi suh beithe nading in *gene* (itahsa chung a natong neu cha-cha, hinna eipe hou) hi hetchet ding apoimoi tin Chales Darwin evolution theory poimo dan atahsan kit un ahi.

Greek Philosopher Plato in amudan in mihem khat hungphat theina ding achun ahungsei letna mun environment ahoi angai e atin ahi. Hito kilhon in Gabriel Tarde France social Psychologist pan aseina achun mihem aphilou (criminal) or phatlou lungthim pojing michu ama ahina a hung koundoh ahapon ahungsei letna lungchang akoun hung umjoh ahi anati, example apen na chu Gucha insung ahi leh guchath lungthim apo tei in, apha insung a pengkhat chu alunggel phatna lam a akai teije anati. Amaho thusei hohi theologically a vetding in adihlouna tampi umjong leh lhangpi/japi hindan teho atah lang un adih najong tampi a um in ahi. Amaho mudan akoun imu son thei uchu technology hin ichen nau environment akhel in (apha lang hihen ase hijong leh) hiche

environment chun eiho lungput (psychology) jong akhel in ahi. Hiche hohi anoi ajong anvet beu hite.

#### 3.1 Environment in I-Lunggel u (Psychology)

**Akhel Dan:** Bruce H. Lipton Wisconsin’s School of Medicine a Professor, “Cell Biology” jilkung a pang pan hitin ana sun in ahi. “ipu ipa va-koun natna hita hen umchan hitajong leh akilason e (heredity) ti lunggel innei-te houhi tahsan lhem ahi in, hitabang hohi a um-mong e ti aki prove theipoi, tukhang biologist koima atahsan a umtapoi” tin ana sei in ahi. Charles Darwin jeng injong Moritz Wagner lekha ana thot in hiti hin anasun in ahi, “Kahinkho a kaki sihna lenpen leh kasuh khel lenpen chu, environment (chenna leh ummna mun) in lunggel leh hindan akhel teho kana ha khol thuhlou chu ahipen e, ahin lah *Origin* kajih jou kum ijat ham nung in environment in thil akheldan teho evidence (sakhi) tampi kamudoh thah in ahi” tin anasun in ahi. Lipton in aseibe na achun Darwin in ana suh khel chu ama jou a research hinbol tampin asukhel toupeh in, tahsan lhangpi a anachepi jing uchu, anu-apa thisan a beh thil khat chu acha injong anei tei in hichu akikhel ngai poi ti ahi. Hijeh chun apa or anu iti ham a boina nei khat chu acha jong kigin-mo nanei pum in achung a hitabang natna chu hunglung ding angah jing in ahi. Ahinlah mihem hi achenna leh aneh ho in ahin-dan leh a *gene* hojeng jong akhel jou in, hichun alunggel jong akhel tei in ahi.

Environment in ilunggel u akhel thei e tia scientific prove aum thei leh eiho Kuki society sung jong ivel vet kit u angai in ahi Technology khantou hin eiho hi neucha bou eitong khavin ahinlah atham je leh adon butje hah sa isa vin ahi. Mihem ikom a umkhat kihoupi sang in online or midang kihou pi ding or game kichep ding tiho poimo isa ji vin hichun kingailut naleh kilungsetna khatvei teng ikom va koun alahmang thei ding in akilang in ahi. Kingailut naleh kihet themna hi kimu mun-jeh leh kihou munjeh a pung ahi in, ahinlah hiche kihou matna leh kimu mun nachu technology in alah mang dan in akilang e. Eiho society a kilungset na aum thei jeh hi ibol jouse u ahon (group) a bolte ihi vin hiche kipun khomna leh kiloi khomna jong technology in tukhang ahin asuboi pha in ahi.

### 3.2 I-Tobang Environment a Khang Hunglung-Ding Nalam to Nom em?:

Psychologist hon mihem hohi thil ahēt jeu chi thum in akhen un hichu, consciousness, sub-consciousness chule unconscious or coma ative. Hiche hohi abai pen a seiding in thilkhat chu nahet pum a nabol a-um in nahinbol dungjui chun nahen ahi example lekhasim- lekha nasim akoun thil nahetdoh hochu conscious tah a het akitin, sub-conscious; aki ti leh hetlou a nalhoh in information jat-jat ana het or ana nei chu subconscious akiti. Mihem hohi lungthim (brain) ahāt dan chu hinna-ding (survive) thil agel doh pai in hichu “khatbei a khat ahinthei louding” akihet jeh in society asem khom un hiche akoun chun hinna aneithei un ahi. Ahinlah ganchaho hin hiche lunggel chu aneithei povin hijeh chun athi-thi jeng un gancha achi-mang jong a umda poi, hijeh a chu Darwin in “survival of the fittest” *ahat hat hingdoh* anati ahi. Evolution akoun (point of view) a ivet leh eiho hi ahat leh ahingdoh ho chu ihive. I-hin jeh uchu ipi ham iti leh ilungthim u (brain) hatjeh ahi in, hichun survive nading eigel doh sah thei jeh u ahi.

Iseinom pen uchu ahi leh lungthim cheta-bang hat chu inei uva sub-conscious (hetlou kah) ajong thil tampi ilungthim or I brain un eipeh thei uva ahi leh chapang kumkhat alhin masang akoun, aham theilou vang a alung thim in computer a thil download ibol tabang uva thil tampi hi ana download ji ahi. Mihem te lhoh hatdan hi a athem ho neuro-scientists hon aseidan un ilhoh uhin itahsa jouseu hi avet-tup (control) ahin, ithil bolgot jouseu jong hi ilhoh akoun a information cheji ahi, hiche information ache kah chu agandan second khat jong alhingpoi ativin ahi. Naosen in thil sele thil pha ahēt na chu insung akoun ahi in, ima ahēpoi tia nagel vang in alhoh in thil tampi ana download ji in ahi. Chechu ahitah leh gah gelleu chun Kum-gup (6 years) sung achun information ijat a download dem ti chu hetjeng thei ahi. Hiche a download hochu “subconscious mind” a lutji in morality (apha ase) ipi ham hehij jong leu insung ahungsei let na dan-dan in society a alhaji in ahi. Hiche alhatdan te ho chu a subconscious mind chun ama ahindan akan चाह jeh ahi.

Tulai akhoh dan chu chapang umdan hilsang in mobile or computer game kichepdan mitam pi in ahil masa ji in ahi. Loi le pai toh kivopdan ahēt masang in

game or internet a lunglutdan ahemasa kit nalaiset un ahi, heche tabang akoun chapang hungsei lending chu aloipha pen chu technology langtoh kisai thil hungghi ding, alhaset leh alungleng vai-na koima kom a aseid nading hung umlouding ahi. Tuchan ahin *KHANKHO* masang bang jou hih jong leh inei nalai un ahi ahin tuban kum ijat hamjou chan ding gel ving-ving lechun khang ahunglung ding ho hungsei let nading chu mihem holah hilou machine or technology entertainment a kimang lah a hung khang lending u koima in asopi asang gam ahol beh louding ahi. Lunggel pilhingsa hobeh hin technology toh social kivai homdan hohi balance ibolthem got-ding in kadei in ahi.

### 4 Technology leh Ethics

Technology khantou hin ethic jeng-jong nasa tah in atongkhan ahi. Second World-War laitah in Leiset miching loilah a anaki he Albert Einstein in Atom Bomb asem in atepna teho mi ijat ham ading in lhisona in apang in adeh in Japan hoding in Einstein ana penglou hileh kipa umleu khopding in akilang in ahi. Alangkhat in Osama Bin Laden jengjong mi ijat ham ading in kana ahikit in ahi. Anihon in mikana ahihon in ahinlah khat chu scientist minthang tah in amin akihe in scientist hon ahou lou bep a vat in pachatna achang jing in ahi, ahinla khatpa vang mipha motopsan in leiset chung a amin hetden in aum in ahi. Ethically a ivet leh ani hon a mithat ahi lhon in, mithat kiti chu chonpha in akisim (justify) theipoi. Ethics iti leh chondan dih le dih lou seina ahi in, inatoh le ithil bol in mi atoh khah leh atoh khah lou vetsuina ahi. Ahinla technology khantou na hin eiho ethical hinkho jengjong nasa tah a akhel in kamu in ahi. Technology mangcha in Scientist hon eiho gelphah lou lampeh thil tampi abol jing un hiche hojeng jong chun eihin toh khah jomjing nahlai ding u ahi, ahinlah tu (present) a iboinau joh igelding un kadei e.

**4.1 Kapoimo (Needs) Jeh ham Kadei Jeh ham?:** Ipi hijong leh anei thei ding a kilom kahi a, kapoimo na leh kavat na a eikithopi thei ding thil ahi leh kanei thei ahi, ahin lah kadei jeh a kanei mai mai ahileh hichu kapoimo ahilou jeh a boina eisem peh tu a lepan thei thil ahi. Tu masang in Chinese khangdong numei khat in anasei khat chu, “cycle chung a tou a kipah tah a hinkho mansang in BMW sung atou a kap pum-pum a hinkho manding kanom joi” anatin ahi. Eiho Society

sung a khangdong hojong hitabang lunggel nei chu itam lseh jeng un ahi vetding a kilom-lom leh ahoi-hoi i-vat u hi-hih jong leh neiding ithau anom in hiche tabang lunggel akoun iki tim hat lou uleh khat vei teng leh I society uhi, “ken kaneh pou leh kaheng kakom in ngol jong leh akhoh poi” ihin tiding u ahi. Eiho nam neucha ading a poimo pen a igelding uchu iti le lekha hasim in kasim in khang ahung lung-ding hobeh hi vetset umlou in hinkho ahin mandiu vem ti ahipen e. Student hina jal a poimo chu ipi ham ti ihet thei teng uleh aban chu ahiding dol in hungche nante.

**4.2 Phatna (virtue) Sang in Bike or I-Phone Kadei Joi?:** Churachanpur - Lamka a chapa chang khat, minei joubeh sheh hilou class 9 simna lai khat in anutoh apa kom a smart phone khat nei choh peh lou uleh school kahai ding ahi ati in, anu apa jong alung don val beh jeh in, inn mun khat anei uchu ajoh un achoh peh hon in ahi. Numei chapang ijat ham jong phone hoitah deina jeh leh adeichat thil khat suh-bulhit ding dei jeh a ahina joh doh jong atam lseh jeng in ahi. Technology khantou jeh in mitla thei ding thil tapi nitin in apung jing in hichu idei val teng lamdih lou jot khoh ana kisa jipon imihi naleh iphat na jouse akijoh mang khaji in ahi. Chohdoh thei lou phatna pahi chomkhat mai-mai ahoi ding leh akilom ding deina jeh a johdoh jengding in apamai in ahi. Bike or phone hoi neilou jeh a collage kailou or loile pai lah a lhat nomlou chu lhou louding ahi. Kipana kiti hi thildei neivang a kinei ahipon chondan thep jeh leh pathen a kipeh lut jeh abou kinei thei joh ahi.

**4.3 Kamihem Chankhompi toh Kihou Sang in Electronics thil Hotoh Kihouding Apoimo Joi?:** Eiho hi social mi (social being) ihi vin kivai hopna leh kivai poh na hi akijam san theipon ahi. Ijam santhei lou jeh un milah a lhat angai in lunggel kihet peh to angai in ahi. Ahinlah tulai ahin ei ho society sung jeng ajong mitoh kivop or kihou sang in electronic thil ho toh umkhom nom isa jovin ahi. Research kimu dungjuu in kum 15 apat 35 chan city leh town a cheng ho 100 lah a 70% hi 40min kalval mitoh kihou lim abol thei pove ajeh chu electronic thil ho a alungthim u aumjoi akiti. Chule mi atam jo hin aphot atamjo social networking a phat asumang jolive ti aki mudoh in ahi. Karl Marx in mihem hi athil boltah ama kikah a nitin in kihoumat na aumjing in ana toh hin mihem pa lunggel or lungput chu akhel ji e, hijeh chun mi

psychology nahet nom leh anatoh ipi ham hen anati. Chonchat vai, tot chatvai, thuman lou sei atamjo hunggin dohna hi electronic thil mobile or computer ahi tei e, internet toh connect ibol to pou leh thuman lou seinading jong atam kit in ahi. Hiche tabang hochu nalung-gel najo sah leh naheng nakom ding khatvei teng namu joulou ding ahi.

**Conclusion:** Technology khantou hi nasa tah a kakal or kaphat sah lou ahipon ahin lah technology iman themlou dan te ho phamo sapum a kahin sei joh ahi. Technology hin ivat u asuh bulhit thei laisen aphan ahinlah hiche khel lam achun aman panmun aneipoi. Panmun ipeh tei tei uleh eihoding a boina semjoh hunghi ding ahi. Friendship kiti hi mikhat leh mikhat kikah bou a aum thei in thildang toh a um thei tah-tah poi. Religion (pathen tahsan) kiti hi eihoding a lunggel genthei jangkhai na, Pathen toh kivop na leh thijou ading a hinna lampi eihil thei uchu ahi, James Wilkes Psychologist in ase na achun, religion a lunglut hohi lungthim kipana (mental health) midang sang in anei thei pen un chuleh, damthei najong anei pen uve ati. Ahinlah tulai hi technology religion a nei a kipana online a hol atam in ahi, research bol jong lekha hasim a scholar hisang in google scholar atamtan ahi, khat in internet hi phatchom pi naleh thil hetna in nei jongleh khangdong atamjo hi internet hetna leh chihna holna amang alhom in, entertainment leh time pass bolna a mang atamjoi. Phat khat teng hichun tahsa keu hilou lhagao hinkho jong atoh khah ding, hinkho chom naleh tonsot thina a inei joh khah ding u ahi. Environment in milunggel akhel thei e ti in mi atamjon pomjong leh environment in commitment khat in alungthim pumpi a aneichu amoh jo joupoi, environment hoileh hoilou najeng ajong chamlatna (free will) a um nalai in hiche pa mangthem ding a chu iki got u angai e.

**For query, suggestions and information,  
article**

**Contact the following:**

**Editor**

**Mobile: 8415934372 (Whatsapp)**

**Email: laldiox777@gmail.com**

**CHRISTIAN HINKHO'A  
PHATVET/MIRROR NAMAN JI HINAM?**

Mr. Lunminthang Lungdim  
Director, Koinonia Gospel Ministry



Mihem hinkho a mirror kivet nadi umlou hile abui di dan chu imel jong ki2 het pontin, anen lai imu lou tamtah um intin, Von jong ikilop pi leh kilop pilou jong het hahsa ma2 di ahi. Mirror manglou a um chu mi nui

sat jong kihi thei ahi. Mihem hinkho a mirror um lou hinkho itobang ahidi iheu tauvin ahi. Chuti ahile Christian hinkho a jong itobang hinkho iman am, i-thusei ichondan kihet ding apoimon ahi. Hiche hetthei nading chun Christian hinkho'a jong mirror vet Jing ding apoimon ahi. Christian te dia phatvet chu ipi ham? Bible/Pathen thutheng hi ahi.

2 TIMOTHY 3:16 chun "Pathenin ahu alhakhum Pathen lekhabu chengsi hi kihil nading, kipo nading, kipuijang nading le lam dih lam'a kisin sah nadia phatah ahi" atin ahi. Bible in Christian khat chon ding dan ijakai eihil uvin ahi. Ipi jeha mi tamtah Christian hi nunga hinkho lui a chon jing nalai le lhagao lam'a khangtou thei lou ahidem? Bible sim a taona hinkho lhahsam jeh ahi. Bible sim a taona nei jing lou chun midang toh alhat khom teng ahina akihet ji tapon, bol ding le bol lou ding ahe ji pon, mi setna bou amun ama phatlouna amuthei ji pon ahi. Chuteng le chun Pathen akon agamlha ji tan ahi. Initin hinkho'a Bible sim jing hin ilhin lel na eimusah jin, eipui jang jin chuleh lampi dih eihil jin ahi. I-lhinlel naho ikihetdoh teng Pathen henga kile kit'a Christian lampi dih ijot thei diu ahi. Chuteng le chun midia vetton um kihi thei ding chule muthim lah'a um ho dia meivah kihi thei di ahi (Matt. 5:14-16).

Christian ho lah jeng'a jong I-Pathen houdan-u ivet teng Christian lhem le Christian Bible sim a taona nei jing mi alhom dan mudoh thei ahi. Pathen thu sanga leiset nup sahna le haosatna gelkhoh jo, Khamna thei'a kibuol, Pathen thutheng kipuisah hilou in Pathen thu eima deilam joh a kipui, Pathen ei-deilam'a kihou atam tan ahi. Innsunga Bible um na helou, hou-inn a Bible choi peilou le Bible hou-in a choi jing, ahivanga sim ngeilou itam jeh uva Christian chon ding dan helou tampi akium in ahi. Christian hinkho'a Pathen

lungdei lampi jot jing thei nadin Christian mirror/phatvet; Bible sim a taona nei jing ding apoimon ahi. Ahin, Bible simlou hinkho in vang alampi jotna akihet ji pon ahi.

*"CHRISTIAN HINKHO A MIRROR (BIBLE) A NAKIVET JING HINAM?"*

**TULAI ICHRISTIAN HINKHO MAN-U**

By: Thangchungnung Mate



- 1) Pathen helou ihi pouvin, Pathen neiloute ihuive.
- 2) Pathen Ngailu loute ihi pouvin, Pathen khohsah loute ihuive.
- 3) Dammo jeha Houinn kailou te ihi pouvin, ithaset Jeh uva Dammo te ihuive.
- 4) Vaichat jeh-a soma khat pehdng neiloute ihi pouvin, Pathen a dinga i-peh nom lou jeh uva vaicha joh ihuive.
- 5) Pathen thu heloute ihi pouvin, Pathen thu hinpe loute ihi joh ui.
- 6) Pathen lamkaina hilouva, eima thanop<sup>2</sup> na a Pathen jong eithanop pedinga taote ihuive.
- 7) Kam-a, seithem te ihuivin, Practical a podoh loute ihi ihuive.
- 8) Pathen a kisel te ihipouvin, Pathen sel mangte joh ihuive.
- 9) Jesu Christa boipi tah sanga, Denomination thu boipi-a mitoh kitohmo te ihuive.
- 10) Pentah ipi ham heloute ihipouvin, Chonset dalhah nomlou Jeh a, heloute ihuive.
- 11) Pathen thugil tah<sup>2</sup> ngainom te ihuivin, Lhagaova idammona sudam nom loute ihuive.



## 2018 KGM SPORTS MINISTRY REPORT

By: Mr. Thangchungnung



### Sports Ministry Leader.

- i. Mr. Thangchungnung.
- ii. Mr. Alisha Boichon

Amasan Report pethei a damna mantam eipe Hatchungnung Pathen thangvah in um taken, Hitobang a Bulletin eihi ministry khantou nadinga tohgon hinnei, Lamkai ho le, adih a Editor Pu Bro. Lalboi chungang jong kakipana thu kahin phonge.

### **I. AKI PHUDOH NI**

KGM Sports Ministry hi, April/22/2018 (KGM 2nd Anniversary cum Sports day) achun ana kiphut doh in ahi, hiche a mopo dingin achunga Lamkai teni hi lhendoh anahi lhone.

### **II. AKI TONGDOH HO**

(Yearly plan ana kigong lou hijongle Pathen phatna jal in anoiya hohi tohdoh/boldoh in akineiyee)

- i. Koinonia Sports ministry Jersey Chohdoh in aum in. Football le keeper Glove jong lemdoh in aum e.
- ii. S.Haijang veng 7 Men Soccer a pan akilan ahi.
- iii. Dt. 12 July 2018 nin Seilal veng 7 Man Soccer Open Tournament a pan akilan, \*CHAMPION\* ana kilan ahi.
- iv. Dt. 10 August 2018 in, 7 Men Soccer S.Gamnomjang aJong pan akilan ahi.

### **III. 2019 TOHGON KINEI HO**

- i. KGM Sports Ministry in Khatvei Sports Organise bol ding.
- ii. Tukum SK TOURNAMENT a Panlah ding.

### **IV. EXECUTIVE MEMBER**

- i. Josphe (Director KGM)
- ii. Santosh (Co-ordinator KGM)
- iii. Minlal (Principal Grapevine)
- iv. Chochon Singson
- v. Gracy (M.Songgel)
- vi. Hatneo
- vii. Kimrose

### **Members**

- |                                  |                      |
|----------------------------------|----------------------|
| i) Chuchung                      | ii) Boichon          |
| iii) Lalboi (Assam Regt.)        | iv) Gigin            |
| v) Ns. Paocha                    | vi) Semboi           |
| vii) Thangcha                    | viii) Fings (minlen) |
| ix) Dinglen                      |                      |
| x) Gogou Hangsing (Bangaluru FC) |                      |

---

### **TULAI CCPUR REPORT CHOMCHA**

Source: TRIBAL NEWS-Special Report

- i. Govt natong hingal a Govt natong lou a Houbung/Church na tong a Govt lo ki la2 jing mi 30000 val aki um e□
- ii. Ccpur a pathen Lasa ho sangin Jolla saho aki neo Sah Jo un, houpi anom Jo uve...
- iii. Ccpur a pathen Lasa ho sangin Jolla saho aki neo Sah Jo un, houpi anom Jo uve...
- iv. Public urinal shed jouse ah eh aki mu e.
- v. Ccpur khopi sung a president 100 Val um din ginchat ahi.
- vi. kum khat sung in bandh ni 20 tobang aum in, students leh neh kihol Thu ho din boina lentah aso doh e.
- vii. Achesa phat a 3 Bills Chung chang a inn mun len pi<sup>2</sup> leh inn thupi tah2 nei ho sang in Inn bahara a um ho aha pan joh uve ti muthei in aum e.
- viii. UG hon gam le nam apao me pi uvin neh ahol in...MLA MDC hon Meithai Chaga te jang in neh ahol uve.
- ix. Gam le nam ngailu ki tam diu2 Kito Mona pung diu2, mimal ki khangtou cheh2.

## INTERVIEW WITH MINLUN HANGMI (Proprietor - Passion Dance Studio)



Amasapen a inamsung uva Dance lam a Kuki te Michael Jackson a kihe le Pathen thu lam a vetton um tah Bro. Minlun Hangmi, Proprietor Passion Dance Studio toh kihoulim thei dia eikoi u Pathen thangvahna ipiue.

**1. KGM:** Amasapen a na min, family chanchin le kho min ho nansei thei di ham?

**Minlun Hangmi:** Keima kamin Minlun Hangmi ahi in kamin tah chu ahi leh Thangminlun Misao Hangmi ahi e. Ucha pasal 4 leh numei 1 kahi uve chuleh kaucha lah uva atah pen kahi e. Kanu leh kapa jong Pathen lungset in adam jing nalai in, tu ahin Kamdouveng a ka um uve. Kakho tah uchu ahi leh Misao Lhahvom ahi.

**2. KGM:** Secular lam a ichan nasim a, Chule maban a ipi bol di na tup am?

**Minlun Hangmi:** St Paul Institute a secondary 2017 achun kana chai e. Ccpur college a aban kana sim jom in ahileh boina themkhat jeh in kana kai pai thei tapon. Tukum ahi hoitah a kithah pat ding katie. Maban a ka lungtup chu ahi leh eimi sung ahi dance khantou sah a chuleh choreographer mi hetthei khat kahi num e. Chujongle kaneo lai apat stunt lunglut kanahi in, Chinese actor Jackie chan khu kei adia ka inspiration ahi e. Eimi film industry ajong ka jo kham2 in pan ka la nom e. Ipi kisei jongle Pathen lungdei lam2 vang hijo hen.

**3. KGM:** Passion Dance Studio hi eiho gamsung a dia Dance studio masa loi ahi in ministry adin jong kithang-at aum l'eh in, Dance hi naneo akon na thanom hitam? Chule hiche Studio hi ipi jeha nahin bol ham?

**Minlun Hangmi:** Lam hi kaneo lai achun i society uva ana chi behset pon, kungfu langho joh a katha ana num masa in kachang a kana bol ji in. Dance hi class 4 ham kasim apat achun kan hedoh in. Hicheva pat chun phone leh internet mangcha in ol-ol in kei le kei kahung kijil tou peh in ahi.

I-society sung uva lamjil na chule kihilna khatcha aum lou hi pohnat na len tah kan nei in chujongle i society uva lam thanum chapang keitobang jong tampi tah aum kahe in, gah sei be dinga chu i-film industry sung uva kikhel naleh khantouna neocha beh kapo doh nom e. Hiche pohnat naho akona Studio hi kahin hon ahi e.

**4. KGM:** Passion Dance Studio nahin bol nadia itobanga support namu am? Chule hahsatna itobang nahinto am?

**Minlun Hangmi:** Thengtah a sei din vang kapa hin eina phatsah him2 pon. Ahin achate lunglut naleh thanopna kham tei2 mi vang ahi pon. Ken jong kanu kapa kom a "henu, hepa kum 25 kahi chan beh kalung lut na nei bol sah lhon inlang nei support lhon in, lekha sim toh katho ding chuleh tonglou injong um ponge" tin ama teni kom a permission kana kilah ahie. Kuki women organisation hon jong sum le pai a eina kithopi uve. Ka hahsatnapen chu ahileh, professional tah a gajil akihilou jeh in students kanei dem kanei hihdem jong kana he pon. Pathen kom a katao a tahsan tah a kanbol chu ahijeng in. Tuchan in vang ka ginchat sang a thupi jo in Pathen in ei pui jinge ti kahe jinge.

**5. KGM:** Passion Dance Studio ahi students i'at nanei am chule khangthah ho tahsa le lhagaova itobanga na pui hui ji am?

**Minlun Hangmi:** Tu tadin students 9 kanei e. Alhangpi in students hi 8-15 hi kanei jing jie. Studio sung ahin Bible chang 2 athupi pen in kaki koi uvin Collosians 3:23 chuleh Ephesians 4:2 ahi e. Kipat kon, kilha doh kon chuleh munchom2 a kapot di teng ule Pathen kom a kaki lhan jing uvin Pathen kamasat sah jing uve. Chuleh tu February apat ahi 1st saturday sih leh angol taona Prayer Mountain a ganei ji din pha kasa soh kei taove.

**6. KGM:** Tuni chan a programme ho a Passion Dance min a nahin tep nau mun i'at um tam? Maban a Studio hi iti chepi di nati am?

**Minlun Hangmi:** Programme vang chu kaha jao behseh naipouve. Music video vang studio min in 3 ka shoot doh taove. Akidam a Studio ache hoi peh ale vang dance bou hilouva, stunt chuleh acting ho jil natoh kopbe ding kati ahi e. Chuleh mun dang eimi chen na lah a branch hon be ding ka nom e.

**7. KGM:** Lasah le lam ani in nabol thei in mi talented tah khat nahin, lasah le lam hi hoiche joh na lunglut am?

**Minlun Hangmi:** Lasah toh lam hi kaneo apat a kana lunglutna pen teni ahi in. Lunglut iti levang akibang chet in kalung alut nan hijong leh profession a chepi din vang dance joh hi ka lheng joe.

**8. KGM:** Passion Dance Studio nahin bol akon ichan ham a mihet nahung hitan, FB friend request hinbol hi ichan a tam chom am? Dongma hi itih phat a nei pha nasah am? □

**Minlun Hangmi:** Haha..Kahe tahih e chivang chu. Friend request vang tamchom thou na chu. Dongma hi inchen semthei kahi teng leh nei pan ding katup ahi e.

**9. KGM:** Koinonia Gospel Ministry hi na phatchompi dan le a khantouna dia boldia pha nasah nasei thei di ham? □

**Minlun Hangmi:** Avel in Koinonia Gospel Ministry a kahung jao thei jeh in Pathen kathangvah e.,Koinonia a kahung jao apat in Pathen ging jing chuleh lhahsam naleh hatmona a Pathen thua ei til khou thei, ei panpi thei loile pai chule ute tampi kanei tan kakipah in kalung among lhez jeng tai. Maban a jong tua banga lhasam louhil leh kilung toh tah a ipan jing dingu chu ikhantou napen dingu hidin ka ging cha e.

**10. KGM:** Achaina dia taona ngaichat hihen sei nom dang ipi nanei am?

**Minlun Hangmi:** I-society sung uva nule pa te atamjo hin achateu lunglutna chuleh a talent hou hi akhohsah behseh naipouvin. Lekha lang bouhi kihin so nadan in agel uvin. Chijeh a jong khangdong tamtah setlo dan in jong kagel in. Nule paten chate thanopna jong ahin gelkhoh theina ding uvin ana taopeh uhi te. Chule ka studio hi Pathen lunglhaina ahi-a phatthei aboh thei nadin jong neihin taopeh leuchun kanom ngei e. □

Tunia KGM Bulletin toh kihou nadia naphat man tamtah nahin peh jeh in kipathu kahinsei in, Pathenin Nang le PASSION DANCE STUDIO a natohkhompi cheng phatthei naboh uhen lang Pathen lenggam a panla khom jing din eima pui jing tau hen.

## THUSIM CHOMCHA

(GOLCHA NGAITAH NI KITHUDOH NA)

By: Lalboi Doungel

Nikhat golcha ngaitah mini ahung kihou lhontan ahile, Agolpa in aloipa hengah chun thudoh na ana neitan ahi. Golpa hiche vacha khu epi vacha ahitadem tichun (Va-cha) min chu dohna ana neitan ahi. Aloipa in ana don but na ahchun, Hiche Va-cha hi “Lungset umtah Va-cha” ahi tin ana donbut tan ahi. Phat le nikho ahung chal toh kilhon chun avelin ni khat dohna ahin neikit in, golpa hiche (Vah-cha) khu amin epi ham tichun ahin dongkit tan ahi. Chu in aloi panjang hitin ana donbut kit in hiche Va-cha hi “Chungleng Va-cha” ahi tichun avelin donbut na ana neikit in ahi.

Nikhat aloipa jong chu alung adong phat in, a-velthum chennan dohna ana neikit tan, golpa hiche vacha khu epi Va-cha ahidem, amin epi kitim, ti chun ana dong kit tan ahi. Chu phat in aloipa injong a velthum chen kithu doh na toh lhon chun ana donbut kitan, Loipa hiche Va-cha khu amin (Jangvah Va-cha) a ki-ti e ti chun avel thum chen na in aloipa thudoh chu ana le don but kit tan ahi. Chunin aloipa injong agolpa chu moul sang khat lhang ki choi mun khat ah apuitoutan “mol-vum” sangtah chungah chun atou sah in achai nan hi che thudoh na neikit tan ahi.

Golpa “mol-vum “ chungsang akon janglam phaicham gam khu khu ve-temin, Vacha tampi namu ding ahi, hiche Va-cha hokhu amin cheh nasei lha theidem ti chun thudoh ana neikit in ahi le, Chuin amapan jong janglam chu avein aloipa ana donbut pai jengtan ahi, Loipa/Golpa hibang tamtah jang-Va “Va-cha” teho khu khat cheh a eti amin kasei jou ding ham, ama ho lah akon chun khat bou neidongin, Khat bou chu “amin” kasei ding ahi tichun ana don but kit leu-leu vin chu in thuchai nale thukha na ana neitan ahi.

*“Kicha hih in ajeh inem itileh keiman ka umpi jingnai, lungthoi hih in ajeh chu keima na Pathen kahi. Keiman nahatsah ingting, kapanpi ding nahi chuleh kagaljo na khutjet lam a ka dopsang jing ding nahi” Isaiah 41:10*

## HOI LAM AH UM NAHIM? (Geneses 3:9)

By: Hegou (Sijang Village)



**THUMAKAI:** Hoi lam ah um nahim? ti thucheng/Awcheng hi ivet a igel le mihem khat in, mihem khat kiholmo na akouna Awcheng/thucheng kimanna ah ahi ti hi ihetsoh kei uvin ahi. Ahin lah hiche Awcheng / thucheng hi Pathen in mi-

-hemte chonsetna ah alhah jou uva pathen in mihemte angailutna a akouna thucheng/ Awcheng masapen joh ahibouve. Adam chu pathen in achonset masang chun, akiloi khompi ji in golle pai bangin ana kigop ji lhon in, nomtah in hinkho amang bom ji lhon in ahi. Hiti chun Pathen le Adam chu akah lhon ah ima boina ima aum lhon pon hiti chun nomsa tah in hinkho lhon'e. Ahilah PATHEN in Adam kom ah nehrou dinga aseï bollou dinga aseï chu Adam in ana neh tah jeh chun Pathen toh Adam chu ana kikhen lhon tan ahi. PATHEN toh Adam kikhenah goh keo hilou vin Adam chu tahsa thina(Gen 3:19, Ps 90:10) leh lhagao thina(Gen 3:9-11;Isaiah 59:2) chu achung ahung lhung tan ahi. Pathen in Adam amuthei lou ahipon Lhagaova athi, chu jongle chonsetna ah ahin nalai jeh ah chu Pathen in Adam chu amu theilou jeh ah Adam chu, pathen in Adam tia ahin kou joh ahie. (Gen 3:6)

### **TEKAHNA LE TILKHOUNA:**

Tulaija Christiante tamtah Pathen in nehrou ding a thupeh, bollou dinga, chonlou dinga thupeh, Adam bangin in mihem tamtah simsenlou SATAN in galhinga akaiya kitom dohlou joulou ahilou le kitom doh nomlou nomsa val val a hinkho manga, thina chan geitoh Christian tamtah ium uvin, pathen in Adam banga aholmo ah pathen in akouna Awcheng kijah lousah, ema a selou, ija koilou va Adam banga Satan in alungsung mit asuhchot peh ah pathen thulam ah Gospel kipana thupha ah khomu theina amit suchot peh mihem tam tah igamsung uva atam lneh tan ahi.(2Cor 4:4). Thulhun lui laiija jong pathen thupeh nitlou jeh loujeh nasah lou jeh a MOSE in jong kannan gam chu PISGAH (Mt.Nebo) mun a chun ana galdoh in ana lhung thei tapon ahi (Num 20:11-12) Hiche laimun a chun ahinkho anabei tai. Christa jal a ka innsung mite, tuni nikho ah nang jong pathen in nehrou ding aseï, bollou dinga a sei, ho jouse nabol

ah le Mose in lei kannangam lhung theilou ahin, nangvang van kannangam na lhung theilou ding ahie. Ven sopi chonsetna ah na hing jing jeng jeh in pathen in namu theipon ahin lah pathen in meidel ah nache ding chu aphal lou jeh in Pathen in HOI LAM AH UM NAHIM? tin kihou toh pi din NA KOU JENG E (Isaiah 1:18)

Chu jongle koima hetlou vin pathen in na lungsung kot chu nahon ding ham tin kinemtah in nalungsung kot komma adingin nalungsung chu akeo jinge. (Rev 3:20). Ole Adam bang ah pathen toh kihou toh ding nomlou, chu jongle Chapa vangpa pan anei le gouse ajam mangpi banga nangin jong na chonsetna chu na jammang pi hitam? Tuni nikhon in jong Pathen in HOI LAM UM NAHEM tin NAKOU JING/NA HOL JING nalai je. Na umna mun a kon chun hung pot doh in, Mundeh lou, Noti kijohna mun, judonna mun, nanu le Napa deilouna mun, Pathen deilouna mun, chonset umna mun, hiche laimun hi hin dalha in Ole nangma tahsa ngaichat jep mai mai ja pathen toh tonsot a kikhen ding nagel lhah hitam (1John 2:16).

Tukum hi nang dia kismethah kum ahin, pakaiyin nakouna Aw hi nahsa a na koilou le navang se ding, chu jongle nang dia Damun meidel(Tonsot a kikhenna mun) chu nang dia got sa ahite. Sopi. Hoilam a umna him" Na umna mun chu nang umna ding mun hinam, pha ten kivat phat o na umna lou ding mun ah um khan nate. Phat pha le nikho pha ahi ahung lhung pet hin pakai na tong loi ute. Ajo khat le tohthei louna phat hung lhung get inte (John 9:4).

Phat kijen pet cha hin phat kichoh in lang Pakai kom hinbel loijin. (Eph 5:16)Christa zal a ka singsung mite ho Mose'n Cannan gam achan lo in, thupeh nehrou jeh in, nang jong thupeh nitlou jeh ah mose'n Cannan gam lei Cannan gam achan ahin, nangin van Cannan gam na chan ding ahie. Veuvin, tu hi nang dia huhhing na phat pha ahiye. (2Cor 6:2) Na kism thahloule vaigei khan nate. Geisang le chun tonsot kot Nungah nga lungthim bei ho bangin pakaiyin tonsot kot hong nom ponte.. HOI LAM AH UM NAHIM

Hung kinung le tan.



## CHRISTIAN INSUNG NOM

By:Kamlalsem @ Semboi Singsit



**THUMAKAI:** Christian Insung kitihi, itih'a kipan ham? Tihi koiman inaha-boipibeh pouvin, tunihin "CHRISTIAN INSUNG" kitihi mihem khat'a dinga ichanna poimoham? Ti anaveute. "INSUNG" kitihi Pathenin mimasa Adam le Noah

mangchan "INSUNG" kiti anaphut doh'in ahi (Gen. 1:28; 5:32). "INSUNG, CHENNA IN" iti-teng leh mihem jouse dinga poimo mama jeng chu ahin, mihao, mivai, leng le lal, chaga genthei, khutdo, dinmun sang nei, dinmun noinung pen , aching athemho jouse dinga jong poimo khat chu ahin ahi. "CHRISTIAN" Iti tengle, 1st, Cuntury AD, laiija oilou (Unbelievers) hochun Jesu nungjuiho tin, anaheuvn ahi. "CHRISTIAN" kiti thuchenghi Bible pumpin, thumvei (3-times) bou akimun ahi (Acts. 11:26; 26:28; 1pet. 4:16). "CHRISTIAN" kiti thuchengin akoudoh chu "Jesu Christa nungjui ho, Jesu Christa ahuhhing pu'a kisanna, thichanna dinga tahsan ho chu Christian kiti" ahin ahi. Ahinla Christian ti'a kiminv'o ahiyala, Christa toh kijopmat lou aumkit'in ahi. Amaho chu (Nominal Christian) amin maimaiya Christian tin akihen ahi. "CHRISTIAN" kitihi Jesu Christa toh hingkhomho ahitah le, itobang ho chu "Christian Insung" ahitadem? "Christian Insung" iti phatle asunga cheng jouse chu Christian dihtah hidu tina ahin, amin maimai Christian jaoloudiu ahi. Chuleh "Christian Insung" akiti tengle amasa penna Christa jana Insung himasapen ding ahin ahi. Hijeh achu "CHRISTIAN INSUNG NOM" semna dinga chu ipipi poimo ham? ti inavetdiu ahi.

**1. INSUNG HI PATHEN DAN KICHUH NALE SCHOOL MASAPEN AHI:** Insung kitihi Leiset chungu Pathen dan kichuhna/kijilna mun masapen ahi. Insung kitihi Chate dinga School masapen leh Houbung masapen jong ahikit'e. Chuleh thildih, thilpha, ngailutna, khotona, thudih, thenna le Pathen ngaisahna mun, chaten lungset amunao mun, ijakai hetnale ijakai jilna mun masapen ahin ahi. Hijeh hin, Minu Mipan mopohna lentah Chate chungu aneilhon'in ahi. Chate hinkho semphatna dingle INSUNG semphatna dinghin Minu le Mipan Sumlepai, neilegou, etc, ho sanga INSUNG agelkhoh

joh lhonna, Taona to tho'a pan alahkhom lhon angaiyin ahi. Akhuti loule Chate hinkho chu semphat tah sanga, asetnadiu joh suhpungpeh khahthei ahijon ahi. Hijeh hin Minu Mipa chihthei angaiye.

RICHART LEEHAN in hitin anaseiyin ahi. "INSUNG NOM, chu Nute dinga loupina ahin, Chate dinga Vangam, Pate dinga Lenggam ahi", anatin ahi. INSUNG chu INSUNG NOM ahina dingin, Minu le Mipan mopohna lentah aneilhon ahidan mudohthei ahin ahi. "CHRISTIAN INSUNG NOM" semdohna dingahi Minu Mipan Chate chungu itobanga pan alah lhonna, Chate hinkhohi itih phat'a pat-na semphat-lhon ngaiham? Tihi dohna (Question) umjing khat chu ahikit'in ahi. Mitampi ngaidan'in chapang hi Kum 5-10 lam alhin tengle bou jilna le Pathen thua khoukhahna inaneipan jiuvin ahi. Ahinla chapang hin anu oisunga konna jilna phatah anei ahitahdan Bible a kon muthei ahin ahi. David in, "kanu oisunga jong chonsesa kijil kahibouve", atin ahi (Ps. 51:5). Minu tampin naosen avop phatleu adudu anejiuvin, tohle thamjong hahsatahtah atong jiuvin ahi. Ahin miching mithem hon, naosen anu oisunga hungki jilhin, ima aseitheilou vangin, anu lungput ijakai aheshohjin, ase apha geltheina lungthing jong aneipan taove, tin ase un ahi. Hetdinga pha chu, minuten naosen hi anu oisunga akijiljing laiija jonghi Pathen thua jilthapeh ngaija ahitai tih het angaiyin ahi. Ahin chapang hin lunggel (idea/concept) aneipahi ama tahsa ahung khanlet dungjui'a ama selepha hetna dungjui'a ahetha jong hung khanglen ding ahin, hijeh a hi, apilhin theina dinga hi ama tahsa ahung khanlet dungjui'a jong Minu le Mipan tahsale lhagao lam kihilna/jilna ol-ola ahin neipipeh lhon angaiyin ahi. Vetsahna (example) a seidin, chapang in kho ahinhet phatle Insung maicham a, taodan, lasahdan, Bible simdingan, etc, ho Minu Mipan aneipiiji angaiyin ahi. Bible in "Chapang chu achonna dingdola kilomin khou khah-in, chutileh ateh geiya jong hichu asuhmil lou ding donlouva akoi lou ding ahi", atin ahi (Pro. 22:6).

Minu Mipan aphatcha chapang ho hinkho ikhoukhah louleu ahinkhou chu tonsot thinalam jonna kitoldiu, kihuhhing manloudiu ahi. Minu Mipan chate hinkho semphat ding igeljing laiya jong amaho chungu thilpha-lou lhungthei ahin, chihthei angaiye. Minu Mipan chate khoukhah na'a suhmil-lou dinga pha chu;

- i. Chate hi ngailutna neitah le khotona neipuma khoukhah ding ahi.
- ii. Chate hi deisatum/ngailuttum neilouding ahi.
- iii. Minu Mipan chate dinga hi phat kaneipoi./phat aumpoi tiloudi ahi.
- iv. Thildang tohle tham, sumlepai, etc, jouse sanga chate hinkho semphat dimghi athupi pen'a gelding ahi.
- v. Insunga kijatodan, taodan, lasahdan, bible simdan, etc, ho hiljing ding ahi.

Eiho society sung hi ivetna ahile Chapang khoukhahna lam panghi alhasam lhev jengin ahi. Minu Mipa kimkhat ivetle chate hinkho semphat ding tih pona tahtah aumin, Minu Mipa kimkhat kit chu chate hinkho semphat ding lamlam jong gekpha lou aumkit'in ahi.

SAM DOHERTY in "Chapang hinkho semphat ding/huhdoh ding kitih pohnatna neiya bolding, pohnatna neilou jeh'a bollou ding ahipon, Pathen thupheh ahijeh'a bolteitei ding ahi", atin ahi (Matt. 18:14). Hijeh ahi Minu Mipan imopoh-nao chu bolteitei ding ahijeh in, imopoh-nao (Responsibility) hi toh molso (Fulfill) angaiyin ahi.

## 2. CHRISTIAN INSUNG NOM SEMNA DINGA

**KICHENNA:** "KICHENNA" kitih Pathenna hungkon ahin, chule Pathen amatah'in aphudoh ahijeh'a jabolding ahin ahi (Heb. 13:4; Matt. 19:4-5). Kichenna hi mihemte dinga, Pathen thilgon lah'a agilpen le hinkho'a kikan gom -na chu ahin, Adam asemelona subbulhit-na dinga vangbohna chungchon kipe chu ahin ahi. Hijeh'a chu amani chu ni hitalouva khat hilhon ahitai. Hijeh chun "Pathen gopsa chu mihemin sukhen hihhen" (Mk. 10:6-9). Kichenna kitih Houinna thupi-tah'in kibol jogle jinei hina dihtah chu chahsang (kitchen), insung, lupna, indan, natohna mun, Pathen houkhom namun, genthei nikho kipanikho, etc, ho'a kilangdoh dingbou ahiye. Kichen na'a khutjem kibupeh-to hi athupipen ahipon aw-dam heucha'a kihouto, lunggel kiseipeh-to, kitahsanto, etc, ho chu poimojo ahiye.

Tulaiya mi tampi kichengho ivetna ahile kilungset maimai, ngaichat subbulhit-na ding maimai'a kicheng akitamtan hijehhin Pathen'in anagon kichenna thengtah hi amanlut ding bangin amanlu joupon, jeneitah'in jong akimang cha theitapon, kisuhbohna

joh'in akimang gamtan, kichenna chung a jong Pakai alunglhai ding bangin alunglhai joutapon ahi, ti i-inchen khosah dannuvin akilangjin, hijeh hin "Christian Insung Nom" semna dinghin lhahsamna akicheng teni chung a aumjin ahi. Kichenna kitih CHRISTIAN INSUNG NOM semna dinga kalbi (steep) khatna bou ahi ti suhmillou angaiyin ahi. Chuto lhonin Christiante kichenna jeh point phabep ana veute.

- i. Kivopkhom/kiloikhom ding (companionship).
- ii. Numei Pasal ngaichat subbulhit ding (sexual fulfilment).
- iii. Chanei ding (procreation).
- iv. Christian Insung Nom semdoh ding.

Insung tampi ivetna ahile kichenna chung a boina umjing hohi ipijeh hintem tih dohna lentah (big Question) umjing khat chu ahin ahi. Bailam penna seidin akicheng tenin "Commitment" aneilhon loujeh hiding ginchat umpenle mitampi lunggel chu ahin ahi. Hijeh achu akicheng tenin CHRISTIAN INSUNG NOM asemdoh lhonna dinga chu achung a kiseih ajuilhon angaiyin ahi.

## 3. NUPA KAH A BOLDING LEH BOLLOU DING HO:

Mi tampi ivetna ahile KICHEN nunga bolding le bollou ding jong gelpha louva mohkichen a moh hinmimai jong aumkit in ahi. Ahin hetdinga phatah chu CHRISTIAN INSUNG NOM semna dinghin bolding le bollou ding aume tih suhmillou angaiye. Chuto lhonin anoia hin bannei chan boldinga pha point phabep anaveute.

- i. Insung maicham, taokhomna, lasah khomna manjing ding ahi.
- ii. Houin kaiteng kilhonkhom jingding ahi.
- iii. Thil bolkhel/suhkhelna chung a thupha choi gelding ahi.
- iv. Kivopkhom jinga kiloi-khom jing ding ahi.
- v. Kipachat to jing ding ahi.
- vi. Thuboi seikhom jinga, kinel lou ding ahi.
- vii. Khat le khat kijato'a kihetthem toding ahi.
- viii. Alang nia Insung kihetthem toding ahi.
- ix. Chan chung a lung-oi gelding, mipa minu danghotoh kitekah louding ahi.
- x. Christa toh kilhonkhom jing ding ahi.

Nupa kah'a bollou dinga poimo point phabep chu:

- i. Thakhat a lunghan khomlou ding ahi.
- ii. Lunglhai sella kikhen tilouva, kinah lunghan pet'a kikhenlhon louding ahi.
- iii. Iki lunghanna ikinah jongle nisa lhunkhum sahlou ding ahi (Eph. 4:26).
- iv. Insunga kinelna aumpoule jamsan-go hih'in, jam-san sanga boina chu kihou toh'a semphat ding ahi.
- v. I-lunghan behseh tengle thu tamsei loudi ahi.
- vi. Minu Mipan mi gaosap le phunphun jeng bollou di ahi.
- vii. I-lung ahan poupoule ka-inna kile tange, na-inna kichekittan tilou ding ahi.
- viii. Phat chesaho'a chonset nale sukhkelho seisei kit-tah loudi ahi.
- ix. Insung thuguh pamlama mohseisei hih'in.
- x. Thilneo chacha hochu thil lentah sosah lhon-hih inlang, naki-ngaina lhonchu thisah lhon hih'in. Nungah gollhan-laiya kingailut-na sanga giljo'in kingailu lhon-in chutile CHRISTIAN INSUNG NOM semdohna dingin kalbi (steep) aban kalbethei lhonin nate.

**THUCHAINA:** Insung Nom kitih mitampin angaichat mamao leh adei mamao chu ahin, ahinlah Minu le Mipa tampi ivetna ahile Pathen hemi, Pathenna kingai jing, taojing mi, alhamsam kit'in ahi. Hijeh hin chate chungu Pathen thu kihilna leh kilamkaina alhasamin hijeh hin, chapang hinkho tampi semdohtah sangin setna lama vaitham amajojin ahi. Chate hinkho kisemdoh louho chu jilecha ahinnei teng leu ajineinao leh chalena aneinaovin, khangdong hinkho amanlaju sangin, boina achungnung jo chehjin ahi. Hijeh hin amasa penna hetdinga pha chu "Insa a Pakai apan loule Insa hon panna beiya asah-u ahi (Ps. 127:1). Minu Mipan chate hinkho asemna diuvin amasa penna PAKAI akhatna a akoilhonna amanin jong lungkitoh tah'a pan alahkhom lhon angaiyin, chaten jong amalam hinkhouva CHRISTIAN INSUNG NOM asemtheina diuva khangdong hinkho aman laijuva patna aki gotnu angaitan ahi. Hijeh hin CHRISTIAN INSUNG NOM semna ding hin, amasa penna eima kisemtup masat apoimon ahi. Eima ikisemtup joutengle abanna midang hinkho semding ahin ahi.

----- KGM ROUND UP QUIZ -----  
February Issue

1. Jesu Christa pen lem a hung ahsi lekhatthem hochu mi ijat hiuvam?

Ans: \_\_\_\_\_

2. Egypt gam a natna hise a thum chan na chu ipi natna hise ham?

Ans: \_\_\_\_\_

3. New Testament bu hi ipi pao a kisun ham?

Ans: \_\_\_\_\_

4. 538 B.C lai a Babylon ana touphe lengpa chu koiham?

Ans: \_\_\_\_\_

5. Bible a kimu dungjui a Nineveh khopi chu koi in ana sah ham?

Ans: \_\_\_\_\_

6. Tuleh tua Manipur Governor a pang pa/nu min ipi ham?

Ans: \_\_\_\_\_

7. Koinonia Gospel Ministry Director pa Birthday itih ham?

Ans: \_\_\_\_\_

8. Tuleh tua Northeast gamsung a mipi kiphin na leh deilou a kisei CAB hin ipi akou doh ham?

Ans: \_\_\_\_\_

**NOTES:**

- i. Hichi Quiz hi kitahna neitah a Google velou a, chuleh mi donglou a iboldiu dei aume.
- ii. First, Second, Third hi next issue leh hung kitahdoh ding ahi. Chuleh kumlhun tengleh amamupen pen chu kipaman hoitah kibolpeh ding ahi.
- iii. Answer nahin thod na ding mun chu ahileh anoi a Whatsapp no. 8415934372 ahi.



# Photo Section



*KGM Advisor Thangjalal Wedding (18 Jan)*



*KGM Advisor, Lalboi Doungel Wedding (19 Jan)*

## *Koinonia Gospel Ministry House Visit Programme*



## *Koinonia Gospel Ministry Annual General Meeting at K. Nivangphai*



*"Commit your way to the LORD whatever you do, and he will establish your plans."  
Proverbs 16:3*